

瓊州府志

瓊州海口海南書局印行

瓊州府志

清康熙二十九年刻

瓊州府志卷之三十六上

人物志七

篤行

元

明

國朝

元

林友仁瓊山人郡知事材幹賢能有隱德

明

吳伯雄瓊山人有材能洪武間出仕歸隱居閭里課蒙養晦不趨權力

賈志

邢貴文昌人永樂乙酉鄉薦任沅州訓導宦歸以儒禮訓誨鄉人喪祭絕去俗尙經明行

修人皆師仰

蕭志

鄺信瓊山右所人力學篤行設家塾教子弟二子俊傑皆業儒俊隱居傑以賢良方正薦

授崇安縣丞仕至廣西僉事

黃通志

謝寧臨高人登宣德乙卯賢書任福建寧化訓導年四十致仕王佐爲之傳曰性謙而滑

稽遇鄉里無少長皆降禮常牽一欺段自隨道遠力乏則乘之稍息復徒步有盜其禾者他人縛而致之遽釋其縛謂曰君饑乎然別有處饑之道此非君子所爲也厚賜遣

之其人感愧不復爲盜

臨高志

李珊瓊山人成化丙戌進士授行人使占城賜從二品服選南京福建道御史陞廣西僉

事整飭柳慶兵備詩文敏暢有古愚集

牛志

梁繼瓊山人成化癸卯鄉舉任徽州府推官改嚴州俱有政譽卒於官狀元唐梟挽以詩

練水無聲存舊澤桐江有恨入驚湍所著有竹溪集

同上

王公遜字時敏澄邁庠生端方正直見義勇爲家頗裕饒族鄰每待以舉火歲荒捐穀六

千五十石助賑有司奏聞奉旨獎勞敕建尙義坊

澄邁志

吳璿澄邁人成化壬辰歲荒當道檄令捐賑璿慨然出米三千斛以濟畧無難色郡邑重

之及卒武昌推官周賓銘其墓

李大鵬澄邁人恩貢幼貧失怙恃年十四始知書從郡庠士郭同山游授以經義郭嘗試

之曰吾知爾貧束修不計也他日何以報我對曰傳師之業廣師之惠他日授徒亦不

敢計束修是爲報耳後由貢選歷榮邱教授恬淡自甘取與不苟族弟無居讓宅與之

路拾遺金還其主郡守徵爲鄉飲大賓辭不至節推張材造廬禮焉清標雅望沒世猶

存俱同  
上

唐朝允字邦儀儋州人早孤性剛毅克自樹立嘗從儒士梁成學勇於從善知無不爲州牧陳永時見學校傾圯議遷基改建區畫悉出朝允宏治辛酉符南蛇亂朝允率義兵堵禦一方賴以安有故人托金二十兩已爲賊掠及事平乃貸償之終不言及正德間任桂陽訓導至則敷陳條約止風教作士氣同官有彭姓者卒於任親爲視斂盡捐俸

餘賻焉乞休歸

儋州志

劉廷著字章甫定安人貧力學躬爨事親少以孝名研窮理學教授生徒瓊定登科第者多出其門嘉靖己酉應貢北上遇故友張士毅之子張希舜落拓京華贈資遣歸司訓南靖循循善誘士子相慶得師未幾遘疾乞休諸生請留謝曰職雖微安可以臥病爲人師也浩然而歸邑人士爲之志去思焉孫銓歲貢有文名

定安志

林鶚瓊山人少孤貧竭力奉母以舌耕爲業人有貧負債者不取償年八十口授經書訓子及孫所著有別野集

陳高字宗陵瓊山人郡庠生天然仲子敦族睦鄰訓育孤姪如子奉庶母如母兄被誣抵

責高請以身代晚年謝絕世務吟咏自適

牛志

吳一元瓊山人邑庠生少孤事母孝時以詩文適志年荒乏食經歷何應徵餽之銀米不受其守如此

同上

許伯良澄邁人仗義喜施初爲義寧訓導歷綏寧敦禮教肅學規門下有鬻女者代贖之值歲荒捐俸埋殍骨卒於任祀綏寧名宦

賈志

邢文成字道蘊文昌人守正不撓尙義好施業儒不售然好學篤行至老不倦厚延名師教子傾家不惜子裔昌舉於鄉祚昌成進士

楊彥字兆東儋州人萬歷初偕薛通考貢督學以通年耄文劣屬意於彥力辭不就友人翁正思省試卒爲經理其喪扶櫬歸葬以歲貢任合浦訓導歷南康教諭湖州教授致仕歸一肩行李清濤自持舉鄉賓十有七次卒年八十三祀州鄉賢

儋州志

### 國朝

李說字言兌瓊山人膺歲薦鴻才碩學遠近求詩文及草書者屢滿戶外生平無疾言厲

色藹若春風而望之儼然有先民軌範卒年八十

蕭志

王凝機號問溪瓊山人康熙間歲貢品端行潔善詩文工草書邑乘殘缺獨有志修明搜討編輯多出其手年八十餘方瞳皓髯吟咏不輟飄飄有出塵之概

周熙朝瓊山人澄邁歲貢少穎悟能文溫柔敦厚孝友兼至遭父喪鬻產營葬一遵古禮胞兄熙輔貧推已田產奴僕遺之無所吝

黃含宏瓊山庠生素履無玷行誼可嘉母病朝夕不離側撫姪如所生族戚有貧乏鬻子者捐金代贖曾修南渡墟岸立頓林渡船以濟人利物爲志

林昌煜字昭生文昌人歲貢素性儉樸躬謙謹司訓海康獎勉士類署邑篆清白自持雷有二蘇祠捐俸置香燈田雷人陳瓚有記

陳用楫崖州人康熙癸巳副榜沉靜端方謙恭接物潛心經史成就後學與昆季五人咸稱友愛

鍾世聖字師百瓊山附貢性純篤少失怙事母竭誠以承色笑讀禮哀痛毀瘠與人易直和煦善於勸諭里黨雀角得一言而解嘗倡修濟衆迎恩迎龍各石橋呈請疏鑿白沙河以便舟楫稱利賴焉

吳永泰定安庠生爲人淳樸性慷慨康熙年間捐田二十丁入義學爲多士膏火資至今肄業者賴之

邱璣字衡之瓊山歲貢文莊裔孫能讀祖父書乾隆十二年銓保昌司訓以母老告終養後補徐聞教士以敦行爲先幼時聞所居爲形家稱美語乃祖曰一家好不如一族好曷不爲邱氏宗祠耶祖從之生平見義必爲持躬清白一時當道稱其不愧名賢之後王元翰字蓋林臨高人乾隆己卯副榜爲人謹厚敦善行姪媳某氏孀居爲之立嗣分已田以贍之成其節家被竊賊曰此王老物也私負其物以還元翰慰勸之賊愧悔爲良民凡修廢舉墜悉捐囊爲之倡

吳福字綏之瓊山人賦性敦厚門以內無遺憾尤好善樂施建宗祠置義田立社學凡力能任者無他諉族有盲女二各給奩金三百兩爲之嫁子位和博羅學博孫典翰林院編修贈如孫官卒年八十一人以爲盛德之報云

王必聖字愚若瓊山人庠生質淳厚母周氏嚴肅有不悅輒長跪承歡生平簡默自守望之令人生畏鄉人稱爲忠誠長者尤嫻於詩有萍逢偶帙遺稿

林嘉模瓊山人年十一有盜劫其家擒傷其父嘉模追里許攀樹巔大聲呼救鄉人出援

之父得無恙鳴之官盜伏誅居恆恂謹自持至老無非議之者

俱肅志

莫燦錦字綱心定安人順治間拔貢少以孝友聞爲人深沈慷慨鄉黨有不平得其片言立解邑素苦役累錦創議均徭鄉人至今德之值歲饑施米賑粟全活甚夥恤孤貧修橋路尤究心儀禮里中吉凶諸事必躬爲指示人服其訓

縣志

王懋曾字沂元定安歲貢生明尙書宏誨曾孫少遭兵燹孤苦流離卒能復其先緒爲人雍容儒雅工吟咏力行善事創宗祠置祭產修橋渡不惜重資

同上

謝瓊猷澄邁人康熙二十年父元明被賊楊二等傷其首血流肌腐瓊猷以口吮之竭力調護得活兄歿撫猶子如已出置產業令子與二姪均分當寇亂時族人逃散瓊猷獨身當大役寇平招族還鄉衆咸德之

縣志

王時炯字晉予樂會人康熙庚午鄉薦爲定襄令秉性孝友服官廉明惟恐速謗以貽親憂勤撫字緩催科食其德者比之召杜涖任九載行取入爲主事士民建生祠立碑以

誌遺愛

樂會志

程鵬字雲際定安人康熙癸酉鄉薦家貧好學淹貫經史天性純篤所獲修脯悉以奉親

贈弟父沒後奉母命唯謹族人貧不能就傳者極意教養與諸弟友愛尤篤季弟鶴亦博學能文家居城市足不履公庭有司咸高其節地方要務多造廬商榷學使陳惠華表其門曰瓊南端士

縣志

林湖仁字帶五文昌人乾隆丙辰舉人少孤貧力學通大義性情冲澹與物無忤嘗被辱於市不與校其人自悔踵門謝罪卒爲感化遭兄喪或勸應試湖曰功名所以顯親苟忘吾兄何以功名爲竟不試嘗主本邑講席教人以品行器識爲先沈邑宰彰不時過訪語不及私宰甚器之

莫紘號紫峯定安人充澄邁恩貢跬步謹飭辭氣溫和平鄉黨有不協者得一言無不帖服乾隆辛酉偕貧友吳正栗赴秋闈試畢歸途病劇紘爲奉湯藥調護至家乃死壬辰大水村中廬舍漂沒紘煮粥賑之活者甚衆修家睦宗族性恬淡不樂仕進惟以讀書積善爲事年八十四卒以子景瑞任知府贈如其官

曾允俊陵水增貢生天性純厚一門雍穆文章品節士林所宗輕財好義捐建祠宇乾隆元年舉孝廉方正給六品秩卒年六十有八子書拔貢官開建教諭亦以學行稱

阮通志

林士正文昌人五歲失怙恃教養依於母舅性敏悟弱冠入儋州學累薦不第家益窘辛  
羹諸粥或併日而食仍手不釋卷不自知其窶也居室湫隘誦讀每在叢竹下間字質  
疑者多攜榼裹餽就竹間士正或以蔬食菜根餉客談坐竟日陶然也士林以安貧好  
學稱之

採訪冊

邢璣文昌人歲貢生風範端凝居心敦厚有從姪自市夜歸受傷卒於道姪屬含冤鳴官  
久不獲犯擾累無辜璣力勸其家呈縣銷案鄰里德之偶途中遇盜詰之盜曰爲窘迫  
耳璣諭以大義且助之貲盜感泣竟化爲良邑令伍重其學行延主義學講席髦士多  
出其門

同上

覃瑋猷本姓王字振素會同人充樂會歲貢任普寧訓導秉性和厚立品端方嘗捐己貲  
以建宗祠族中子女無依者爲撫養婚嫁墳墓無嗣者爲修築掃祭乞休歸囊無長物  
年八十而終

楊景山字仰齋萬州人弱冠登乾隆辛酉賢書癸未成進士出宰崇義誘獎士類軫恤民  
艱解組歸士民餞送三十餘里生平不治產業惟以詩書課子孫至老手不釋卷嘗修

學舍建書院事關名教必汲汲爲之卒年七十三

韋乙瑗號遽伍樂會人由拔貢領乾隆甲子順天鄉薦授稷山令建思文書院擢知寧州  
又建泥陽書院多士德之遷洮州撫番同知值回部謀逆督率番民防備周密人賴以  
安

王元侯字承弼澄邁人乾隆癸酉鄉薦見聞賅洽淡薄自甘由保昌教諭擢陝西洋縣令  
豁除雜稅士民咸悅去任日闔邑紳民泣送數十里

莫景瑞字輯五絃長子少工文詞書法弱冠選拔乾隆甲午登賢書以教習期滿出宰慶  
元廉潔自愛擢知趙州屢以捕盜功改順天東路同知遷大名知府攝巡道事嘉慶癸  
酉以滑縣教匪滋事望吏議落職杜門不出以清白世其家年七十九卒

莫景環字象五定安人景瑞弟孝友持躬詩文清逸以優貢生任潮陽訓導春風和氣待  
士甚厚潮俗械鬪當事每令景環下鄉勸諭多有解散者未滿任致仕歸家居創建義  
田族黨事咸待部署論事和顏易色而聞者悅服年七十事老兄嚴肅如父里黨重之

俱同  
上

楊士鼎字龍文萬州人父名山歲貢督修學校造仙河石橋士鼎由拔貢舉乾隆庚子鄉薦歷香山三水教諭調欽州學正遷潮州府教授多士景從成就者衆重修萬安書院建文昌魁星樓卒年七十有六

陳琮字達權瓊山人敏悟好學爲文有理致九赴秋闈屢蹶愈厲乾隆丙午魁鄉薦丁未聯捷進士選授陝西淳化縣知縣邑故磽瘠習尙樸野與民安之以不獲上官意罷歸吳瑾字懷齋瓊山庠生居心平易處事精明援例授陝西潼關廳同知時西陲用兵軍事旁午境當衝要瑾奉委司糧運前官多派役民夫或苛斂富室悉爲革除不擾民不虧帑每出家資以辦公陝民呼爲菩薩云

採訪冊

李賴予文昌人性抗直不詞色假人以信義重於鄉里由歲貢爲保昌訓導與諸生相勵敦品學既致仕囊無餘貲家徒四壁手織竹器爲生計陶然自得未嘗少屈挫居恒出入必布袍束冠肅如也年九十餘卒

黃能振號存愚文昌人以明經授四會訓導口不言財於門下士多所成全任滿致仕歸足迹不到公門爲人寬厚退讓寡言笑和粹之氣達於面目橫逆之來受之不報自奉

極約有公舉如建學宮修祖祠及俟助貧困必竭力不悵教人含容異順生徒日聚其門邑人僉稱盛德云

王德馨號惺齋文昌歲貢年弱冠以文行爲邑令衛希駿所器研究六籍尤深於詩文詞蘊藉爲人厚重深沈練達時務不爲無用之學里中事無鉅細必質之馨部署悉當然不自炫露足不登長吏庭族中自宗祠塋墓譜牒咸修理置祭產贍乏勸學皆賴焉學者稱惺齋先生

曾日景字介昕陵水人允俊孫貌魁梧奇偉能文工書法由拔貢領乾隆戊子順天鄉薦充教習期滿授直隸保定知縣捐修學校置新鎮書院膏火愛民養士以母老乞養歸服闋還任歷署通州霸州卒於任生平樂善有爲如修學校纂邑志建宗祠輯家乘皆竭力成之

雲崇維字道樞文昌增生貌清臞若不勝衣事親能愛敬待諸弟和藹中恒相切劘家素貧恬然安之吉凶酬酢敦崇古禮俗多淫祠歲時迎神賽會男女雜遯失業耗財維與諸弟取神像火之衆大譁或怵以禍不動自是邪氛漸息當道以詩文獎之邑族公事

必推肩任或有牴牾爲排解嚴訓子弟惟以禮義清白是勵大吏舉孝廉方正辭不就著有除邪編並儀禮雜著等書卒年八十二四弟崇緒字道昌凝重如其兄而圭角渾然安貧守約人稱二難

石含章感恩歲貢素行端正居鄉能排難解紛嘗稟請當路勦除賊匪陳有振等不惜捐資不憚勞苦爲地方鋤暴安良故鄉里欽服

林開侯感恩人廩貢官訓導歷署茂名石城電白教諭栽培士類所至不肯妄受一錢家居時嘗捐四百餘金倡修學宮又造六甲冲橋渡修臨高田官道人稱好義

林桂瓊山人乾隆己酉拔貢善文詞書法歷任吳川從化花縣學博爲人坦率瀟灑兄秀亦有聲庠序

李恒暢字茂春澄邁庠生好學敦行少失怙事母孝其兄負債以己田償之建宗祠修橋道族叔樹元孤貧失學恒暢極力周助使就外傳卒以成名後叔以選拔歷任仁化教諭欽州學正清鎮知縣恒暢有力焉道光元年以叔之子恒謙官 貤贈宣德郎

陳玉書字麟徵昌化歲貢少孤貧力學尤敦實行任長寧訓導廉介自持訓諸生必舉古

人成憲以示之年七十八卒於家

林開溥文昌人性勁特自十四五時即能擇師友銳志學古人見善必爲絕惡必力事親甚孝謹善居喪與諸昆友愛無閒言爲文深警直造古人堂奧辛卯鄉試卷既薦主司賞其清挺拔俗竟見遺溥益厚刻厲不少懈年三十二夢與人觴詠曰君愛梅花吾愛酒與君談笑過西湖竟以是年卒士林惜之

俱同上

人物志八 卓行 宋 明 國朝

宋

吳必大萬寧人號碧溪力學篤行嘗有商人失鈔一束於江邊顧而不拾待遺者歸指還

之時稱卓行云

戴通志

明

唐英瓊山人舟之父博通經史百家之學嘗築義學教鄉子弟十餘載不計束修人號其

居曰東善外戚有馮姓者立券假白金五十市馬入驛後負債英焚券不較歲饑甘饘

粥盡所有以賑饑者後生子舟爲監察御史

牛志

梁偉澄邁人仁之弟好施與族有孤貧者嘗買田周給使至成立河中有漂流死屍施棺

捨地權葬鄉里貧窮值歲凶歉則施與稻穀至老積善不倦暇日則詩書自娛享年八

十

牛志

鄧文善樂會人好施予遇暴露屍卽掩之有本縣知縣周泰者始至任卒其子幼不能與

櫬歸文善爲葬於己祖塋側築室處其母子送就學後子仕興府典膳

牛志